

河
防
疏
略

河防疏畧卷之五

義烏朱之錫梅麓可著

濟南

稽山後學徐沁埜公韓

據實 題明疏

題爲據實

題明事據河南管河道徐必遠呈稱順治十六年二月初六日據開封府南河同知趙汝斌呈稱中牟縣黃練集莊西陽武縣范家莊後陳留縣孟家埠口遙堤補築風拍工程該縣申稱本縣備夫自做

不計錢糧今催修間奉有按臺憲示爲嚴飭河工以惕積弊以甦大累事示仰管河等官知悉各于該管堤口不時往來巡察務要身到眼到因勢導流以期杜患於未然其上也若偶有驟決立時一面堵塞一面修築應用河夫柳梢據實動支額設錢糧照數給發不許濫派民間一夫一束併買免那移偏累小民以及虛冒錢糧朋侵

國帑有一於此定將該管官叅拏等因自宜恪遵憲示各縣不敢派夫修築從來修工在此春融之時

轉盼伏水發漲雖有夫役無濟于事失此未雨綢繆之計倘臨時倉卒之變噬臍何及今三縣將欲修之恐違按臺憲令將欲停之又恐誤河工大事此三工者最爲險急萬不容緩者也理合呈請本道速爲酌奪示下以便遵行等情到道據此該本道看得修築河工估計錢糧募夫辦料其來舊矣至于小可工程不便動用河帑該縣勸諭聽從居民自行修築在民則爲自保身家田廬之計在官則省估計

奏銷之煩亦舊例也前據南河廳呈報中牟縣有幫
築黃練集之堤工陽武縣有加幫范家莊後之月
堤陳留縣有修補孟家埠口風拍裂卸之遙堤此
三處均係修補些小工程不便妄求協濟輕動錢
糧各情愿乘此農隙于河水未發之前自爲修補
以圖萬全今奉按院憲示嚴飭不許濫用民間一
夫一束各官無不恪遵但修補小工欲動錢糧恐
干冒糜之費欲用民夫又違憲禁之條真事出兩
難今據該廳呈詳前來不得不具詳轉請合候憲

裁酌奪若不預期詳明倘河水漲發萬有疎虞典
守之責咎將誰諉擬令具由呈請等因到臣該臣
隨卽據詳移會河南撫按兩院內開照得河工那
移偏累虛冒侵欺等弊誤工蠹

國此本部院所深恨而痛惡者屢經申飭諄諄惟恐
耳目隔遠釐剔未易伏讀貴院大示禁飭及此具
仍舟誼至於因勢導流杜患未然原是治河良策
但挽轉溜頭止有挑挖引河一法而此項工程從
來動工不准估計錢糧蓋恐水性難定引河雖挑

而水過復淤導不易導有非人力所能強必者故
防護危險尤以築堤下埽爲急着歲修定制其來
甚久至于決後堵塞則考之前明有費數十萬人
力積數年工程而不克奏績者漕運中梗百計圖
維前楊部院塞大王廟決口亦于通屬歲額外
請內帑金錢百餘萬事後用力不啻百倍洪流漲發排
山倒海或決而南或決而北皆于

國家運道有妨本部院碌碌非才謬肩鉅任晝夜憂
惶所藉于貴院共事疆圉左提右挈者實殷且切

案查順治五年三月內准工部咨爲酌議上下均便之策以鞏河防事內開看得河道修築工程每歲所費不資今河臣計議河工重大動用錢糧興工外其小可工程及狼窩車道殘缺等處令附近居民填塞此爲

國民兩利之議旣經河臣

奏議相應覆

請恭候

命下臣部轉行總河衙門通行申飭等因奉有

河防疏畧

卷之五

四

卷之五

俞旨蓋河長千里頂衝掃濬築長堤捲掃箇例俱估計
錢糧該省每歲額銀除荒徵熟僅存三分之一支
給不敷多撥外解前明額夫之制又復久廢故些
小工程責成附近居民不時補葺用力有限而公
私獲以交賴准照部咨歷年通行在案卽見行所
估各工引河土工夫採物料多有不計錢糧者原
係開明疏內河防舊章四防二守亦有官守民守
之例仍恐各印官觀望輟作管河各官又不敢照
舊嚴催萬一黃河有誤運河亦阻光陰轉瞬事屬

可憂相應移會煩爲嚴飭道府州縣如有小可工程照舊勸諭附近居民乘時補葺運道民生咸荷台庇等因移會去後續准河南撫臣賈漢復回咨內稱准此爲照中州頻年河患修補築濬勞民實甚貴院蒞任之初首禁私派夫料蘇民困釐弊竇計無越此但查總河部院移咨因修築工程每歲所費不貲有河工重大動支錢糧興工其小可工程及狼窩車道殘缺處所令附近居民填塞奉有俞旨遵行已久今若照依來咨再爲申飭是與貴院禁

止有悖倘如不行又恐各屬停工不修過此農暇
後來致有衝決關係運道不惟各屬借爲口實而
民生日益勞困想貴院早有石畫計出兩便希惟
裁示畫一申飭庶無參差之虞矣等因已經移會
按院候有移覆另行申飭外擬合咨覆等因到臣
又准河南按臣李粹然手本回稱准此爲照河工
之急本按所知也河工之弊亦本按所聞也幸藉
貴部院籌畫精詳剔釐嚴切本按無不佩服惟是
河夫柳梢素爲中州大累而所以致其累者皆因

庶司之奉行不善也如派夫之弊名曰照地均輸而實則以一府之派派之一縣甲縣買免復派乙縣轉展那移謂之流派如折夫之弊名曰計工定夫而實則力役之人十無八九巧以炊爨雜遣爲題不惟侵沒應領之夫價而每名反勒索幫銀七八兩不等謂之折乾加之幫貼如包攬之弊僱夫有包僱之人採柳有包買之家不經其手則有夫不用有柳不收通同官役出入皆其操縱致

朝廷額費金錢小民不沾實惠謂之攬頭卽稱河棍

如侵冒之弊各該管總領河銀非抑勒其時則短少其數致使小民畏不敢領稽之則曰節存任之則飽婪應更有堡夫之苦當日設立堡夫原爲瞭望水勢給有工食以養之今則强行坐派并勒以裁節等差每堡夫一名費至七八十兩貽累無窮此本按得之親訪者如此夫中州凋瘵之餘凡額徵新徵供兵喂馬等項業已力盡筋疲若河夫柳梢之弊不稍爲蘇息將必散四方而填溝壑有不忍言者矣節據河道開銷之詳動稱節省多金本

按非不樂於有此而竊恐以尅之小民者邀爲已
功殊非

朝廷惠民之至意又據該道冊報開有未領河銀一
萬四千餘兩業經票行催領等情孰孰小民方以
工資不足糊口柳價不足採辦爲苦豈可役過應
得之物久置弗取之理是非抑勒之明證乎此本
按據之詳冊者又如此凡河官作弊或有司不肖
全在河道之綜核種種積弊該道不知不言是曠
職也知而不言是扶同也將何以爲該道解乎本

按有禁飭之示所以盡剔釐之職掌仍俟再訪得實必會同貴部院入

告非敢于越俎而問也至于派夫之禁適以部科有見給工食之條議本按所禁在濫派耳若大修小修動銀不動銀自有一定之例應聽貴部院主裁乃該道申文中改濫派爲派用而且曰咎將誰諉是以本按有巧卸玩工之咎陰開私派之端之批而亦非有阻于河工也貴部院犀照之下諒當垂鑒急工釐弊自是並行而不悖者也今准前因相應

回復等因到臣又據河南管河道徐必達呈稱凜奉嚴檄方在行查如河庫批發一節從來並無遲閣如本日投次日批領再無遲延第二日者三年來如一日也就十五年工程總計應用當出庫銀四萬七千有零當按院取庫冊之時尚存一萬四千有餘冊投于二月初九日自二月初十日按院行後至三月二十日共四十日又批領過銀一萬存庫不過四千之數則可見未嘗少有抑勒矣合一省計之有八府在內歸計之有開之三十四屬

歸之九屬道里之遠各府縣豈能一呼畢集耶催領之票屢下彼自就便爲緩急豈批發者使之然歟且河工錢糧若干估計之時漫然俱聽領出如應估一萬卽發一萬方爲愛民倘河勢一轉物料不用人夫當放工作當停潑水難收又何以爲

奏銷之地若復追之民間恐騷擾之弊又當糾叅矣故凡奉本部院批與工辦料之後陸續批發工完銀盡者有之工完銀未盡領者于本部院批准題銷之後槩發催票催其盡領悉令出庫方爲掌管

錢糧之職分等情據此除臣已經查取各印官領
狀覈驗去後該臣看得河道修防全藉夫料民間
勞怨固任事者所不得辭也而惟是奉行不善道
廳印河各官不啻數百計下而至于經承皂快里
總火頭又不啻數千計人情巧僞弊所必有此臣
嚴剔河工弊端一疏所以有在官者司道府廳據
實揭叅在衙蠹地棍者各屬推官察報究治之

請臣于二月內遵

旨閱視淮工不期霖雨連月工作浩繁而太行堤二百

餘里自議禁民修之後歷年以來民不願聞官不敢問淮揚七州邑

國計民生止寄命於一綫土壤臣嘔心血口各庄民始漸次趨事然長河千里在在懸心又未卽能分身別顧先據河南管河道詳開河南按臣禁示要其剔釐之志原與臣同而愚民無知遂妄生觀望隨經移會撫按兩臣申飭各官

題估工程上緊續修小可工程仍遵前河臣楊方興題奉

俞旨風勸居民乘時補葺並時發

令旗飭催管河道大梁睢陳兩道未事綢繆庶免貽
誤在案續准按臣移覆手本內開河工諸弊自應
叅究但未據揭報指實查臣於十六年二月內先
經行取各官賢否又准部覆嚴剔河工弊端前疏
現在通行俱未據有造報今准按臣移會復經移
咨河南撫臣就近確查併備行司道府廳各官嚴
查去後應俟查報到臣據實甄別具

題者也所有移行過督催工程查取賢否緣由相應

題明伏乞

磨鑒施行

順治十六年閏三月初八日題本月二十一日奉

貴工部知道

議覆淮工夫役疏

題爲酌議淮工夫役事本年三月十六日准工部咨
開都水清吏司案呈奉本部送工科抄出該本部
覆河道朱總督題前事等因順治十六年正月初
八日題二月初五日奉

旨工部議奏欽此欽遵于二月初七日抄出到部送司
奉此相應議覆案呈到部該臣等看得總河臣朱
之錫疏稱淮揚一帶黃河自順治十三年全黃歸
故之後去歲水患已見太行老堤山清黃河南岸

自草灣以下關民生爲多關運道爲少除五險埽
工照舊募夫高堰石工酌量估計外太行老堤似
應仍責山陽莊民若時迫夫少暫派下流七州縣
等因具

題前來查五險高堰等工原係歲修者似應照舊勘
估修築其太行老堤民修官修屢經更變相應請
勅總河臣會同漕撫按臣從長商酌務期上不誤公下
不累民速行具

題以便另議可也等因順治十六年二月二十七日

題二十八日奉

旨依議欽此欽遵抄出到部移咨到臣准此隨經移會
撫按兩院并行司道查議去後今據南河分司楊
西符淮海道霍炳會勘得山陽黃河南岸太行老
堤延袤三百里則關乎民生居多稽考前明以長
堤修繕維艱公帑金錢有限而

朝廷爲

國賦計百姓亦爲田廬計於是令印官出漕米使百
姓各領之照領米之村分派堤工丈尺自築自修

江陰縣志 卷之三
該縣印籍以爲憑歷年以來雖

鼎革之後無異說也迨後荆隆口決黃河北徙淮安水
勢微弱民無昏墊之苦前按院秦御史遂有停止
民夫之

請夫民心未有不好逸惡勞者因循八九年而民無一
簣之士官無督責之令獲洞雨淋堤已坍卸至十
三年全黃南下水歸故道如去冬大水泛漲以數
載坍卸之堤遇波濤洶涌之際柴溝姚家蕩一時
並決則今歲之議修急急也舊例既係民修仍當

按原籍分派之鄉村而責成之亦情理之無待再計矣若夫老堤之內有蘇建新淤馬邏五工實當黃流直射之墟稱名爲五大險工雖隸山陽境內而下流之害及於揚屬寶泰諸邑者更倍於山陽也故前明曾派七州縣協濟夫料正權其利害酌其輕重勢不得不然耳亦以

本朝初年河決上流淮安水勢平定前部院

題定在山陽募夫千名五工分派儘足畚鍤乃十三年黃河南下水歸故道五工之險非夫多料廣不

能支持而山陽一縣實難于一千之外重加力役之征如今歲當大水泛漲之後堤岸僅存一綫見在五工齊舉似仍當照舊例派下流七州縣協濟者也不特今歲爲然也以後如照常歲修則止用山陽募夫一千名若遇大水泛漲或搶修或大修時迫夫少仍照原定額數取協濟於下流七州縣永著爲定例可耳至於量給食米則各州縣官別爲設處或令民間自相貼併當此河庫空虛似萬難議之公帑者也等因又據該司道會詳呈稱蒙

本部院批據司道呈詳高寶興鹽泰州泰興六州縣循照往例協濟夫役緣由蒙批據詳外河危險山陽出夫已多下流六州縣利害切膚義難秦越相視已如詳檄行矣仰差的役守催赴工應給食米酌妥報奪蒙此又經備行淮安府分管山清河務同知賈雲龍查議去後今據該廳呈詳到道據此該司道會看得高寶興鹽泰州泰興六州縣往年協濟山陽縣外河五工夫役其工食原係各州縣自備蓋因保此五險實所以自保田廬而自爲

身家計也況有舊例仍應祇遵無庸再議也但各夫服勞

欽工距家遙遠或各州縣供億愆期或服役日久勤勞可恤似應預儲食米不時賞賚雖不在常例之中亦寓賑於役本部院格外賞勸之仁也既經該廳查例具詳前來相應轉詳等因呈詳到臣該臣看得山陽縣黃河南岸草灣迤東太行老堤延長幾三百里原在運道之下故係本縣民築民修而新溝建義等五大險工卽大行堤內頂衝掃灣之處

下流六邑協濟修防各保身家歷來久矣自順治九年淮楊按臣

題免鄉夫止於五險各設募夫二百名以供歲修一帶長堤廢弛不問去年秋末冬初河流漲溢處處漫塌雖經搶救無虞然補缺加高幫厚工程浩繁河帑勢不能給除太行老堤該縣已照例催莊鎮鄉夫興工將次告竣外至五險各止募夫二百名工多夫少萬不克濟山陽王公堤高家堰裏河各工並舉出夫已多難以再派據司道呈詳已調下

流高寶鹽城泰州泰興五州縣各照舊例出夫四百名興化縣出夫三百名分發五工幫臺推埽協力僨做但各夫盤費原係自備猶恐運給愆期臣暨司道公議量犒食米稍資乏絕寓賑於役此又仰體我

皇上優卹黎至意出於舊例之外者也俟工完之日用過米數造冊

報銷嗣後太行老堤應責分定莊民自行補葺無庸贅議至五險工每年照常歲修止用募夫一千名若

遇河勢危急工程浩大方調下流人夫協做工完
卽放永著爲例旣經司道會詳前來臣謹會同漕
撫督臣亢得時淮揚按臣馬騰陞合詞具

題伏乞

勅部議覆施行

順治十六年四月初九日題本月二十六日奉

旨工部議奏

工部覆前疏

題爲酌議准工夫役事都水清吏司案呈奉本部送

工科抄出總督河道朱之錫題前事等因奉

旨工部議奏欽此欽遵抄出到部送司奉此相應議覆
案呈到部該臣等案查本年正月內據總河臣朱
之錫疏稱太行老堤山清黃河南岸自草灣以下
關民生爲多運道爲少五險堤工照舊募夫太行
老堤似應仍責山陽莊民若時迫夫少暫派下流
七州縣等因具

題臣部請

勅總河臣會同漕撫按臣從長商酌具

題奉

旨咨行去後今據總河臣會同漕撫臣亢得時按臣馬
騰陞疏稱太行老堤該縣照例催夫興工將次告
竣至五險工多夫少已調高寶等六州縣出夫協
做量犒食米其太行老堤應責莊民自行補葺五
險歲修照常募夫若遇河勢危急工程浩大方調
下流人夫協濟工完卽放永著爲例等因會

題前來臣等議得山清黃河南岸民生攸關其太行
老堤莊民補葺五險堤工遇有緊急方始調夫協

濟旣經諸臣酌妥會

題相應如議仍請

勅下總河臣會同撫按嚴飭司道印官從公僉派不得
苦累窮民如有此弊卽指名

題叅以憑從重議處可也奉

旨依議行

覆淮黃關係甚鉅疏

題爲淮黃河工關係甚鉅宜詳察形勢以護

國課以奠民生事順治十五年十二月十七日准工部咨開都水清吏司案呈奉本部送工科抄出河南道監察御史何可化題前事內開切念河決之爲患非輕治河之爲工甚重黃水安瀾則萬姓受平康之福堤堰衝決則

國賦增度支之憂是黃淮一帶堤口向來動費

朝廷數百萬金錢實耗百姓無限膏血爲河臣者所

宜爲軍

國至計從長籌畫則百年一勞永逸之良策不可不急講也臣先任浙江曾經淮黃地方留心體訪頗得其槩今於邸報見總河臣朱之錫并漕臣亢得時等疏屢報水勢堤岸突決城池浸沒一方漂陷若是乎岌岌矣然但言一時之事而不及前後也但言衝決之地而不言形勢也臣請以所聞

奏夫淮泗之來自泗州入於陂射等湖北折於清口而黃水合流矣自邵伯而北歷高郵寶應山陽安

東皆受湖患而城低於堤者丈有四尺其西爲高
家堰高良瀾二堤以障水勢而水過大則浮漫而
行至淮陽城外西堤皆沙土卽歲有修補終不能
固勢必多爲旁瀉之路而後可則治湖之形勢不
可不詳也又黃河自清口合淮迄東而至五險爲
堤曲折僅百里其寬者不過四五丈耳而河路之
狹僅四五百步夫黃水在河南一帶卽狹者亦經
五六里今以里餘之地收兩河之水雖神禹不能
善其後也又山陽以東有堤其來久遠名曰太荒

長亘蜿蜒僅三百里在前朝出自民間地頭夫每
歲增補高厚焉自御史秦世禎題

准官築以寬民力而歲修亦無定額則官民修築之利
害不可不講也又險堤而外爲鹽城等縣直達江
都每歲鹽課百四十萬取給於此若五險堤岸一
決則鹽城盡被滄沒且非一歲興工可便補塞
國家幾百萬金錢不可不重爲慮也况險工一決遭
漂溺者七州縣房田墳墓盡壞於洪波民命且不
可測況租稅耶則五險太荒諸堤不可不防患于

未然救災於未事也請

勅下河臣親到淮揚審量形勢湖水若何而蓄若何而
洩黃河東下何以收其流何以殺其勢查前朝之
故事量今日之情形不病

國不損民悉心經畫以圖久安漕儲力役均有賴焉
謹獻芻蕘末議伏祈

勅部議覆施行等因順治十五年十一月初八日題本
月十三日奉

旨據奏淮黃堤工關係地方鹽課著詳議具奏工部知

道欽此欽遵於十一月十五日抄出到部送司奉
此相應議覆案呈到部該臣等看得臺臣何可化
疏稱淮泗之水入陂射等湖高郵等處皆受湖患
黃河自清口合淮迤東寬者不過四五丈太荒長
堤歲修漫無定額官民修築之利害當講又鹽課
百萬取給於此請

勘河臣悉心經畫以圖久安等因具題前來查得淮黃
兩河堤岸關係淮揚七邑民生而鹽課租稅尤今
日所最急需者臺臣何可化條議前來應請

勅總河臣親赴淮揚審度地方形勢湖水應如何蓄洩
黃水東下窄狹處所應何以收流殺勢以及五險
太荒堤工應如何修築逐一審勘詳確務求有利
於

國無妨于民經久可行酌議妥確題覆以便臣部另
議可也等因順治十五年十二月初四日題初六
日奉

旨依議行欽此欽遵抄出到部送司奉此相應移咨案
呈到部移咨到臣備行司道勘議詳報去後今據

南河分司楊西狩淮海道霍炳揚州道高光夔會
詳呈稱蒙此隨行淮揚二河廳查勘詳報續據淮
安府分管山清河務同知賈雲龍揚州管河通判
王撫民呈稱蒙此轉行各州縣勘報到職該卑職
覆行勘明擬合呈詳等因到司據此該司道會看
得淮揚之治河也較他處不同在揚屬運道與湖
水相連在淮屬運道係淮黃交流淮河自西而來
至泗州入諸湖出清口達於黃河以資利涉是以
治河治漕必並行而不相悖方於

國計民生而有裨益敢以淮黃之勢言之夫黃河淮
弱黃濁淮清二瀆同至於清口滙合東由安東雲
梯關以入海此從來不易之勢也但黃流濁河易
致沙淤必籍淮流蕩滌方不致梗運病民先年嘗
有分黃導淮之議分黃者於桃源縣迤南黃家嘴
闢一支河使其從旁分洩以殺強黃之勢導淮者
導引淮流歸于海以通運道故淮水偶有暴漲於
南設有高良澗周家橋二閘以備宣洩溢入寶應
高郵諸湖相聯澎湃各建閘座挑挖河渠累築堤

岸捍禦衝決由邵伯金家灣入芒稻河或從瓜儀
注江或通廟灣歸海此蓄洩湖水之法外此再無
庸於旁瀉矣至於雲梯關之灌口固爲黃淮會流
一路寬廣歸海之處每遇河流泛漲無處分殺必
從清河上四十五里仍挑黃家嘴經清河至安東
五港口東流入海分殺暴漲之勢不致南下而清
口得免黃強抵淮阻運之患至新溝等五險工亦
可稍免全河洶湧衝漫之虞誠爲保運安民長策
奈河長二百四十里淤澱年久工繁費鉅難以輕

舉應俟年豐物阜另議舉行其太行老堤山陽境內延袤三百里原係民修民守自秦按院

題免鄉夫之後數年未修又值去歲洪流衝漫處處坍塌卑薄不堪擇禦業蒙本部院具

題已經司道會議查照舊例仍按原籍責成鄉民分修另詳在案再照此堤之內五險工下流關切淮揚高寶等七州縣鹽課亦攸係之歲歲修防勢難緩怠若得有引水一支流旁瀉以減正河之勢以免直射之衝誠保五險之要着第查蘇建北岸官

家營地方舊有引水一河久經淤塞每有興濬議
皆未果蓋緣引河必使深廣同於正河方能借勢
而下況黃河諺稱神河濶數百丈底深水溜不惟
挑濬匪易借使如式寧能保其不旋挑而旋淤乎
亦惟有廣積夫料加意修防以收補偏救弊之功
舍此無他奇也司道在河言河管見如此擬合呈
詳等因到臣該臣看得淮揚郡屬地處卑下滙爲
諸湖淮黃由之歸墟江海於焉受注客水時至一
望汪洋如綫之堤曾不足以禦稽天之浸則疏洩

固在所亟亟也爰自前明挽河資運閱數百載變故卽費數百載經營今其遺跡非不具在然舊貫固有可仍而時宜又有不得不審者臣請條晰而備陳之淮水自西南來趨東北黃水自西來橫截於清口外淮之支流由清口折而南注通江者所謂運河也淮之正流會黃竝驅東下入海者所謂黃河也伏秋之間淮黃交漲淮被黃遏周旋而不得出清口以上滙而爲洪澤等湖則高堰危故堰南有高良澗周家橋兩閘洩水東入高寶白馬等

湖高寶湖東通連運河南從瓜儀入江而地勢微昂宣洩不及則運堤危故運河東岸有涇河子嬰金灣等閘洩水東下射陽廣洋等湖入海有灣頭閘有芒稻河洩水南入於江此運河及諸湖之形勢也堤閘舊制今皆見存間有歲久圯壞者應行酌量估計以時修葺者也淮黃交會由清口而東濁流湍悍衝潰易告查前明萬曆年間曾於桃源縣黃河北岸挑黃壩新河二百四十里分黃一支由五港口歸海以導淮保運卽以殺南岸河患但

淤澱已久工役繁鉅興復實難又崇禎年間塞蘇
嘴建義兩決口曾挑宮家管引河十里暫殺水勢
未幾仍淤蓋河不兩行旣恐徒費况今歲淮工全
集亦有未易竝舉者姑俟民力稍裕另行酌議至
於現今河身濶者數里狹者亦不下數百丈兩堤
去河尚有陸地水長則及堤址水落則復河渠洪
流衝蕩不啻奔馬豈俟人力開鑿收流之議似無
庸贅此黃河之形勢也總之太行老堤實淮揚七
州邑一大保障自前朝來原係莊民自修而中間

頂衝掃灣諸險工亦有鹽城各縣出夫協濟之例
順治九年間黃河北決淮屬士民燕雀怡堂具控
按臣遂爲

題免沮格廢弛去歲冬漲幾成大害此臺臣何可化
特以力役爲言蓋實有見於往例之不當廢耳除
裏外兩河堤埽各工仍應照例每歲勘確詳估
題修其太行五險堤修築事宜臣近於淮工夫役疏
內已經會議

題明應候部覆前疏請

旨遵行以垂永久可也既經司道具詳前來臣復親勘
無異相應具

題伏乞

勅部議覆施行

順治十六年五月初一日題本月二十五日奉

旨工部知道

工部覆前疏

題爲淮黃河工關係等事都水清吏司案呈奉本部
送工科抄出總督河道朱之錫題前事等因奉

旨工部知道欽此欽遵抄出到部送司奉此相應議覆
案呈到部該臣等案查臺臣何可化於順治十五年十一月內疏稱淮泗之水入陂射等湖高寶等處皆受湖患黃河合淮迤東寬者不過四五丈太荒老堤歲修漫無定額請

勅總河臣悉心經畫等因具

題業經臣部請

勅總河臣親赴淮揚審度形勢湖水應如何蓄洩黃水東下應何以收流緩勢太荒堤工應如何修築逐

河防疏畧卷之六

義烏朱之錫梅麓甫著

濟南李之芳鄴園甫定

稽山後學徐沁埜公輯

升旗不法疏

題爲升旗不法大變異常事據北河分司葉獻章東
寬道潘超先會詳前事呈稱本年四月二十五日
淮臨鎮右營駐防安山遊擊朱文舉手本內稱竊
照本職駐防安山專司護漕屢奉上行催儼糧運
刻期抵通時不容緩本年四月二十四日有江西

新安并杭州等衛船隻齊到安山閘上停泊不行
任意逍遙本職親至閘口見水湧板卽令啟板前
行不期運官張學賢等不容督催率領旗丁水手
千餘各執棍棒蜂擁圍住將職徧身打傷衣服盡
行扯碎復將本營跟役范保綁拿上船弔打不放
本日又據安山閘官王國昌報稱有南來建陽新
安等衛重運船三幫巳時抵閘水有十八捺至未
時刁肆不過閘口卑職恐誤

國家重務催伊開船不容分說旗丁水手棍石交加

將閘夫張標等三名撻帶重傷等情似此無法無
天情似叛逆但本營以

國儲重大不便相持合當會報請祈貴道煩爲轉文
各部院亟行剪究以正法紀等情移會到道准此
隨行捕河廳確查續據該廳查覆到道據此爲照
催僨漕船不許時刻停泊屢奉

嚴旨隨到隨催出境文武均有責成今江西新安衛運
官張學賢旗甲吳程韓等船二十一隻建陽衛旗
甲于克惟趕幫船六隻杭州衛運糧守備郭鎮威

旗甲丁三傑等船六十八隻不惟不服督催更且恃衆毆傷營弁若不呈請嚴法究處恐將來毆辱督催官員又不止此矣旣據該廳呈報前來擬合呈報等因據此該臣看得漕糧重務沿河催餉屢奉

嚴綸臣先於閱河之日面諭文武各官惕以

功令又復檄催差催罔敢刻懈董口至臨千餘里河道源高委卑專恃閘座啟一閉二爲之節宜苟一閘停延不惟阻壓後幫卽閘下亦不免待水以濟雖

臣預飭所屬疏壅滯淺殫竭人力今歲雨澤甚稀
猶幸深通無阻然亢旱已久正昔人所云理閘如
埋財惜水如惜金之目也據報江西新安衛運官
張學賢旗甲吳程韓等船二十一隻建陽衛趕幫
旗甲于克惟船六隻杭州衛運糧守備郭鎮威旗
甲丁三傑等船六十八隻停泊安山關上積水已
至盈漕猶然任意逗遛不進遊擊朱文舉分汛安
山奉

旨催儻乃其責任輒敢恃衆不服擁毆職官藐法誤漕

是其日中尚知有三尺哉非嚴加懲處無以爲效
尤者之戒除臣復檄行東兗道嚴催北上外所有
抗催弁丁相應據實

題叅伏乞

勅部從重議處施行

順治十六年五月初三日題本月二十五日奉

旨據叅運官張學賢等擅毆職官藐法誤漕好生可惡
着該巡按御史嚴提究擬具奏該部知道

題明河銀支放成例疏

題爲

題明河銀支放成例事竊臣蒙

恩拔擢謬典河漕遠考河患之變遷近憂河帑之匱詘
蒿目怵心實有不敢一刻姑息市恩以自取焦爛
之悔者故蒞任以來無日不以任怨急公諄免各
屬而惟是因私叢弊法難寬假凡見聞所得臣俱
經不時

題參至於十五年歲終舉劾臣申明激勸大典前疏

於本年三月內部覆奉

旨必俟通行造報甄別具

題已于閏三月內據實

題明在案但所屬遼澗開送未齊客臣彙查舉刺外
本年五月二十九日接邸報河南按臣李粹然有
河銀朦混等事一疏除徐必遠奉有嚴察議處之
旨相應靜聽部覆但內開有管河道徐必遠于二月初
八日投按臣冊內開十五年工程未領銀一萬四
千餘兩業經票行催領等語關臣職掌有不得不

自一剖明者夫黃河工程初時勘度大勢估計銀數築做之時又不得不相機以盈縮其間故十五年劉家樓工估銀二千七百六十兩後以引河挑成遙堤停築不敢開銷魁星樓工估銀一萬九千六百四十三兩後亦以引河挑成止開銷銀三千一百一十一兩河性無定呼吸異形應估固不得不估可省又不敢不省故估計之後聽該道轉行該府均派夫料各州縣官應領之銀聽其酌量陸續支領有先支者有續支者有找支者錢糧干係

在臣惟期其支發以實冊領分明亦不便專亟亟
焉催銀出庫以致報銷之時雖欲覈減而不可得
也况歷來工程或本年銷或次年春銷夏銷不等
甚且一佑可支兩年則隔年而始銷者查十五年
河南共計十工十五年十二月十六年正月僅
奏銷過二工其餘俱在本年二月二十七日三月初
九日二十七日閏三月十五日先後

題銷臣于此時方將嚴覈以圖樽節而又安得先以
盡數出庫督之耶且不但十五年也內祥符縣清

河集商丘縣王家壩二工皆係十四年估計于今
春報完自于今春清覈此在十五年春尚不敢責
之盡數出庫而況十四年乎又黑堽口一工今尚
未行報銷是本年估計謂爲本年工程而其實先
後遲速原有不可限以一例者至臣稽查之法所
據者月則有月報季則有循環歲復有歲報管收
除在歷歷難紊查十四年歲報內有支二十三年
銀二萬二百三十六兩十三年歲報內有支十
二年銀八千三百五十八兩自十二年以上亦皆

有本年支頭年銀開除數目節年

奏報冊在部可一一覆查也在按臣見謂十六年二月初旬尚有估計十五年工銀正在催領似屬過期固爲恤民起見在臣則非不知恤民而急河工慎河帑典守所在勢又不得不長慮兼顧也臣前據實

題明疏內已備述按臣移會手本四月初十日又接按臣河銀朦混揭帖皆有十五年河銀愆期一事如非例所應然臣聞之旣稔豈肯尚爲一刻姑縱

而不卽糾叅者不但恐與歷年歲報自成相左且恐向後鑒爲覆車寧敢過發不敢過存出庫之銀歸集不易河帑之不清方甚耳現今所屬道廳印河等官賢否臣嚴檄藩臬各司道據實開送至再至三如或有誤臣以自干徇庇之譴者臣自應一體

題叅但河銀出納綱領攸存臣旣未便雷同自誤倘緘默不言又恐以溺職取罪謹將支放成例據實題明伏乞

睿鑒施行

順治十六年六月初四日題本月二十七日奉

旨該部議奏

工部覆前疏

題爲

題明河銀支放成例事都水清吏司案呈本部送工
科抄出總督河道朱之錫題前事等因奉

旨該部議奏欽此欽遵抄出到部送司奉此相應議覆
案呈到部該臣等案查本年四月內河南按臣李

粹然題爲河銀朦混異常等事一疏稱河道徐必遠于二月初八日投臣一冊內開存貯十五年未領河銀一萬四千餘兩已經臣部請

勅總河臣會同河南撫臣備查河庫夫料銀兩曾否俱經發完尚有未發若干有無指勒情弊奉

旨遵行在案今據總河臣朱之錫疏稱十五年河南共計十工十五年十二月十六年正月僅

奏銷過二工其餘俱在本年二月二十七日及三月閏三月先後

題銷臣于此時方將嚴覈以圖樽櫛安得先以盡數
出庫督之耶在按臣見謂似屬過期在臣典守所
在勢又不得不長慮兼顧等因具

題前來仍請

勅下總河臣會同河南撫臣速將河道徐必遠未發十
五年河銀一萬四千餘兩有無措勒逐一查明據
實具

題以憑議覆

旨依議速行

免換官兵船隻疏

題爲緊急軍務事順治十六年五月二十九日據濟
寧道楊奇烈呈前事內稱本年五月二十五日蒙
本部院憲牌本月二十五日准總漕亢部院咨開
准二省郎部院咨准操撫蔣部院咨准總督湖廣
李部院咨准羅大將軍咨照得本府奉

旨班師回京大兵至沅州盡由水路前行其辰州常德
澧州等處必須多備船隻伺候應用至荊州喂養
四十日官兵口糧餉銀及馬匹草料槽鏹鍋桶等

項早爲備辦其營房預行料理修葺以便勞苦官兵一到休息事關軍務合行預知備咨前來煩爲查照速賜嚴飭所屬官員預先料理等因准此除駐楚喂養馬匹需用糧料等項另行備辦外惟是羅大將軍遠進黔陽兵士勞苦今由水路班師需船甚多已經本部院會同撫部并按院嚴檄各道府協將封備共一千二百隻伺候坐用但查往例送至江南照數更換今大兵回京期迫勢難緩待相應移會等因又准湖廣巡撫張部院咨同前事

併咨前來准此爲照羅大將軍奉

旨班師回京由水路北旋需船一千二百隻往例送至
江寧更換自應通省酌派貴部院全省提衡仰祈
主裁酌派撫屬若干明白賜示以便轉行道府循
照封覓以濟兵需等因到部院准此爲照大兵回
京用船甚多事屬急需誠難緩誤自當照例通省
均派應請貴部院檄行所屬備船四百隻合三撫
屬共合一千二百之數俱解赴省責成驛傳江寧
二道收管分發大兵乘坐仍令江寧道覓船一百

一隻以備不敷又大將軍暨固山章京等官必需座
船更換本部院令江南驛傳道預備座船二十隻
併池太揚州淮海常鎮蘇松五道各備座船二隻
共合三十隻以供更換但查向來各屬解省船隻
多有賣放及中途脫逃及致臨期輒以不堪混解
耽阻大兵甚爲誤事應于撫屬各府中選風力能
幹佐貳二員耑委分頭催覓各押船二百隻來省
料理可杜遲誤之弊完日准與獎勵以勸勤勞等
因到部院准此除行各該道照數封備業經選委

淮安府清軍船政文同知押赴江寧投交料理外
但查往例送至濟寧照數更換今大兵回京期迫
勢難緩待相應咨會爲此合咨煩爲查照速賜嚴
飭所屬道府協將封備共一千二百隻并座船三
十隻以供更換勿致臨期緩誤仍希覆示施行等
因准此擬合就行爲此牌仰本道照依咨牌事理
卽便親詣河干不拘官民船隻封備大樣中樣照
依派註數目編成字號灣泊月河聽候官兵船到
更換應用事關軍需毋得刻緩致干

功令未便等因蒙此又于本月二十六日蒙本院催票
同前事又蒙本部院批據濟寧州申詳前事等因
備行到州蒙此爲照羅大將軍自黔班師由水路
回京需用大船一千二百餘隻卑職捧讀憲檄驚
愕無措但羅大將軍需船一千二百餘隻自楚而
至江南更換自江南而至濟寧更換固屬勞逸適
均之策但河道之大小與船隻之有無勢有不同
又難一槩而責成也夫楚省與江南素稱澤國跨
三江而帶五湖人人以水爲家以船爲業其商賈

貿易大都以船爲生也故船泊如蟻帆影蔽日雖用巨艦數千隻指顧之間可以立集若夫濟寧不過彈丸之區所管河道南北七十里不過咫尺之地豈可與彭蠡江淮同日而語哉雖有往來船隻不過重運糧艘鞭催不暇豈容片刻停留顧欲彈丸之區咫尺之水而備如許之船誠萬萬所不能也卷查往例亦有大兵經過乘坐大船數百隻自北來者俱乘回空糧船自南來者俱係按船貼給食米隨到隨行並無更換之例但事關緊急軍務

若不預行請明恐致臨期失誤貽戾匪輕雖卑職無足惜所關于地方不小也合無申祈憲奪俯念無米之炊實難封備急行

題請准照舊例貼併庶軍機不誤矣等因蒙批仰濟寧道嚴飭該州一面多方封貼該道一面確查往例速報蒙此隨行濟寧州多方封備并查往例速報本道以憑轉報去後今于二十八日據該州申報蒙此卑州遵照憲文親赴河干搜貼船隻查卑州所管運河僅七十餘里見今重運如織客船時

難停泊卽今沿河一帶或係重運糧艘或係

龍衣差船並無商賈民船可以封貼卑州極目焦思雖
日保株守河干終屬無益歷查前案凡係緊急軍
務船抵濟寧無船更換或量行貼併隨到隨行此
往例也案查順治十四年三月初七日一件爲軍
務事定遠大將軍世子凱旋座船十三隻並無更
換又十四年十一月二十八日一件軍務事駐防
湖廣阿大人班師回京座船一百七十隻並無船
應付北上訖又十五年二月二十六日土固山班

師回京座船四百四十六隻無船應付北上訖又十五年六月二十八日一件移會事梅勒吳章京座船十一隻並無更換又十六年四月初一日一件軍務事回京押馬章京座船五十一隻並無更換貼併食米應付訖細檢前案凡係無船更換俱係貼併食米濟寧咫尺河道卽用數隻一時無船亦難更換况用大船一千二百隻從何得來往例具在擬合據實回報再照南來大將軍需用繹夫甚多若俟探明催備而驛遞額夫有限動銀催覓

亦艱合無申祈憲臺嚴檄各屬預行發銀僱覓協
濟庶臨時軍機無誤而卑州亦免慢誤之咎矣等
因申詳到道據此該本道看得濟寧一區雖臨河
濱爲南北舟車要道然不過信宿停泊卽揚帆攸
往實非會聚之所豈若吳楚淮揚民生澤國非船
則裹足難前捆載無術襟江帶湖極目千里一值
需用船隻片檄號召可以鱗集猶每有不足之虞
今以彈丸濟地如帶漕河而欲與吳楚一同勞逸
卽驅官役晝夜株守河干徒有蒿目椎心亦勢難

猝辦今羅大將軍班師回京需用船隻計一千二百餘隻在楚則有荆襄蘄黃武漢諸郡截江距湖上下共備在江南則有蘇松常鎮江太淮揚上下共備如濟寧地方一經江淮一帶備船供應卽無片帆隻艘北上。是江淮備船之數文方行而濟寧之舟楫先絕。況濟郡所轄之河道南北計程僅七十餘里。乃以矢目立到之地。而與江淮相供應。又不啻天淵。是以該州一奉備船之檄。卽驚惶無措。而有爰查往例。貼併食米之懇也。第遡查往例。則

悉以原船貼併食米隨到隨行又皆歷歷可稽今據該州申詳前來合無請乞憲臺軫念濟地非聚船之處俯賜咨部代爲具

題察照往例此後如大兵乘坐船隻至濟該州照依原船水手名數貼併食米以速遞往庶該州免無米之炊而于軍需亦無誤矣等因呈詳到臣除需用緯夫臣移會撫按兩臣併另行飛檄沿河各道查探前途事例星速預備外該臣看得班師大兵需船一千二百隻座船三十隻淮漕臣尤得時移

咨至濟更換臣卽飛檄濟寧各道分投封備復嚴
檄接催去後但山東漕河止盈盈一綫惟有空重
兵差船隻往來其間原非官商舟楫停泊卸裝攬
載之所與江南澤國帆檣輻輳者實未可同日而
語也且查往例節次大兵經濟因無船更替量
給食米應付前進茲大兵凱旋臣念軍需重大督
催恐後惟是各官殫竭心力止能搜其所有不能
強以所無據該道詳稱請照往例貼併食米庶不
致臨期有誤除仍嚴檄各道儘力封貼以備缺損

外臣灼見事勢復與撫臣許文秀面相商確委應
循照舊例以無誤急需事關軍務不敢不據詳入
告臣謹會同山東撫臣許文秀按臣程衡合詞具
題伏乞

勅部議覆施行

順治十六年六月初四日題本月二十五日奉

旨該部議奏

兵部覆前疏

題爲緊急軍務事車駕清吏司案呈奉本部送兵科

河防疏畧

卷之六

十六

奏審官

抄出總督河道朱之錫題前事等因奉

旨該部議奏欽此欽遵抄出到部送司奉此相應議覆
案呈到部該臣等看得總河臣朱之錫疏稱羅大
將軍班師大兵需船一千二百隻座船三十隻漕
臣亢得時移咨至濟更換山東漕河惟有空重兵
差船隻往來原非官商舟楫停泊卸裝攬載之所
與江南帆檣輻輳者不同節次大兵經濟因無船
更替量給倉米應付前進請照例貼併食米等因
查更換官兵船隻歷年自有已行定例今據疏稱

濟寧無船更替按船貼併食米既係往例應請
勅該督照例酌給無誤軍行可也奉

旨依議行

運河漫溢疏

題爲山水泛漲運河漫溢事順治十六年五月二十
二日據南旺分司劉元琬呈稱本年五月二十日
據滋陽縣申據泉夫劉光遠稟稱本月十五日未
時泗河山水泛漲壩上水高五尺將五閘門盡行
衝開黑風口下板草塞嚴固沂河水有六分後水
未定等情申報到司擬合呈報等因據此又據該
司呈據東平州管河判官王統呈報本月十五日
酉時陶泰等山山水水泛漲汶河水陡長六尺現今

督夫看守土壩等情據此又據本官報稱本月十七日戌時又復長水一丈二尺現今督夫擡土加高等情又據本官報稱本月十六日子時陶泰等山山水泛漲汶河水復長七尺連前共長水一丈九尺各等情呈報到司據此除一面嚴飭該州印河官率領人夫將坎河口土壩積土加高晝夜護守外擬合呈報等因又據該司揭報據魚臺縣管河主簿張名榜報稱本月十八日晚至十九日卯時河水共長五尺六寸本管堤岸高者與水相平

矮者漫堤過水現今嚴督分派汛地築疊子堤晝
夜築守外理合稟報據此又據汶上縣管河主簿
趙應乾報稱本月十六日戌時大雨至十七日午
時山水泛漲自汶河上源流入漕河復長水五尺
二寸上源各水口俱分派各夫巡守外理合稟報
各等情據此理合轉報等因又據濟寧道楊奇烈
呈稱據濟寧州管河州判王心介呈報五月十六
日起至二十日止泗河運河白馬河山水大發陡
漲丈餘師家莊以下狂瀾橫溢堤岸坍陷人夫防

護力無所施等情報道理合呈報等因又據淮徐道李世洽呈稱據邳宿同知孫裔昌呈稱五月十六日未時探得運河因霖雨連綿山水涌出漲發異常兩岸高者水與岸平低者溢出岸上見今有漲無消呈報到道理合轉報等因又據邳宿同知孫裔昌呈稱本月二十一日據宿遷縣主簿沈時達呈稱切照連因天雨半月有餘黃運兩河水勢並發運河山水更盛自五月十五日起至二十日水頭約一丈有餘其湖心大壩石碑口一帶堤岸

平漫鄭家溝洩水不及一分歸駱馬湖黃水雖大
比清水稍弱運河清水直射至黃河南岸董口並
無妨礙據此理合轉報等因又據濟寧道楊奇烈
呈稱五月二十七日據兗州府運河同知佟養鉅
揭據魚臺縣申據管河主簿張名榜報稱切照本
管河道最屬窪下自本月十五日十七日霪雨異
常連日不止河水泛漲由滕縣地方絞股泉出水
洶湧入漕逆流北上河水陡漲四尺有邢莊閘迤
下丘家大壩馬家口迤下王家大壩滿家口迤下

徐家大壩三處俱屬危險要地卑職晝夜往來督率管下人夫加意築防不意十八十九二日又有白馬河水陡長上下水勢相抵甚是洶湧又兼夜間狂風大作將南陽迤東自減水單閘至邢莊閘迤上一帶堤岸漫沒等情據此卑職前目覩水勢三處叠發洶湧異常又兼霖雨連綿復加狂風大作實人力所莫能挽也一面嚴督官夫晝夜培墊外呈報到道理合揭報等因又據濟寧州揭稱五月二十八日准本州管河判官王心介牒稱據師

家莊閘官孫士誠報稱本月二十七日子時起至寅時河內洪水大發又復陡漲三尺四五寸不等且地勢低窪又兼山水湖水澎湃而下波浪掀天復將兩岸閘背盡行漫沒一派汪洋等情到職查勘得此水正在泛漲之際甚是急溜洶湧除一面行令本官摘撥人夫在于險要處所搶護外理合揭報等因又據南旺分司劉元琬稟稱昨奉憲諭本司卽馳赴師家莊閱視閘門并過水形勢督催運艘前進據運官朱知良稟稱閘門水勢洶湧不

敢挽拽萬有疎虞未便本司嚴諭糧運原有程限
豈可任意停泊緣天色已昏不便打船次早隨喚
運官朱知良設法生纜東岸用淺夫二百名西岸
用軍緯三百名本司親督快役催趕挽拽其頭船
方收拾過閘適差官賫捧

令旗憲牌到閘仰藉憲臺威靈衆船始齊挽拽挨序
前進各等因到臣該臣看得運河一綫漕渠受諸
泉之滙注非有支河可以旁洩故稍旱則苦涸連
雨則又苦于溢伏秋水發堤岸受傷無歲無之臣

于孟夏自淮旋濟正值天道亢暘嚴督沿河南北
司道各官料理重運五月初旬之後既幸得雨而
伏秋已屆正擬星赴河南閱視各工不意霖雨連
綿山泉四湧河湖交溢甫接水長六尺報文俄而
驟至一丈二尺又俄而驟至一丈九尺高者平堤
低者漫溢且甚而有沒及閘背者雖船過天井閘
者已多而濟寧以南餘船正係上水絳挽維艱除
先經嚴督官夫晝夜搶護仍多調淺溜等夫以助
挽拽臣復親詣督察外俟水勢畧定卽馳河南徧

行勘閱所有司道各官呈報運河水汛相應具

題伏乞

睿鑒施行

順治十六年六月初四日題本月二十六日奉

旨該部知道

特糾抗誤河工印官疏

題爲特糾抗誤河工印官以保河防事據河南管河道徐必遠呈爲緊急河工事蒙總河朱部院憲票據開封府揭帖內開臨潁縣夫一百九十五名屢催未到等因到部院據此查得各工人夫管河道於二月內發銀該府分發各州縣募夫赴工僱做延今三閱月屢催該縣尚無一夫到工藐玩誤事莫此爲甚若處處如此則河工盡被大誤矣合行查究爲此票仰河南管河道查照節催事理即將

臨潁縣抗違不行解夫致誤河工情由查明并該縣印官職名具文報院以憑

題叅施行等因蒙此查得河工歲修用夫興築何等關係本道於本年二月內呈請各部院預動河庫銀兩發給開封府分發所屬州縣募夫去後各屬先後不等陸續解夫到工築做惟獨臨潁縣知縣熊啟艮十六年行府照該縣熟地原派歲修祥符常家寨河夫一百九十五名屢次行催全無一名到工鄆陵縣知縣經起鵬十六年行府照該縣熟

地原派歲修祥符陳家寨堤工夫二百四十一名
屢次行催於五月十三日解到一半夫一百二十
一名南河廳點查到工夫一百名於一半之中又
少夫二十一名似此兩縣藐工抗夫憲臺若不嚴
懲儆錫向後處處效尤貽誤河工豈渺小哉今將
抗違河夫印官職名擬合開揭具文呈送等因到
臣該臣看得治河一事全恃夫力各省俱設有額
夫獨河南自額夫廢後每年歲修按工估計每築
堤一方給銀一錢而挑引河推埽箇力作之勞其

實浮于土工數倍臣非不知民之稱苦也但河患
關

國計民生黃河安則運道通而民亦享其利黃河危
則運道梗而民且受其害故自前朝來力役之徵
相沿已久今十六年歲修開封府屬應用人夫聽
該道轉行開封府酌量均募蓋河患旣在該府而
州縣之大小民力之豐瘠該府知之自稔必無偏
枯此又與鄰府協濟尚費講求者不可同日語也
且歷年工食俱按土方給銀緣今歲議論不一據

該道詳預動銀四千六百餘兩發開封府聽各州縣支領每夫議預給銀一兩以資餽糧餘仍嗣後清覈乃臨潁縣募夫一百九十五名鄆陵縣募夫二百四十一名節查報工揭帖俱開未到臣復經屢檄嚴催延至五月鄆陵縣始解夫一半一百一十一名及到工又止一百名臨潁縣仍然一名不到時迫伏秋臣刻刻驚憂如當大敵而臨潁縣知縣熊啟艮鄆陵縣知縣經起鵬任呼不應視若贅疣度其意不過曰抗不出夫自不失爲愛民也州

縣各官孰不欲博愛民之名者使人人如此夫役
不前河事安措無論橫流汎濫民憂其魚而漕河
中斷數百萬儲糈將遵何路以供軍

國之資哉既經查取職名前來相應特疏糾叅伏乞
勅部議處施行

順治十六年六月初六日題本月二十六日奉
旨熊啟艮經起鵬俱着議處具奏該部知道